

# Mama n' T'ei!

Kada bes en kuando un òf otro líder den nos komunidad ta vosiferá, “Mayornan a bira materialista i no ta dediká sufisiente tempu na edukashon di nan yunan. Edukashon ta responsabilidat di mayornan i ta kuminsá na kas. Mester elevá norma i balornan òf mester trese esnan ku a bai pèrdí bèk.”

Nos ta totalmente di akuerdo ku deklarashonnan asina. **Mayornan** a frakasá. **Mayornan** mester remediá e situashon aki. **Mayornan** mester elevá norma i balornan. **Mayornan** mester deshasí di un mentalidat materialista. Ma kuantu mayor ta despuesto pa kambia nan sistema di biba pa korigí e frakaso?

Durante dékadanán 70 i 80, hende muhé a ser enkurashá pa buska empleo pafó di kas. “Ekspertonan” a para riba ku “hende muhé siendo igual ku hende hòMBER mester por tin un karera méskos ku hende hòMBER!” Miles di mama a sigui nan konseho. Esnan ku a riska protestá e desaroyo aki a ser konsiderá antikuá.

Desde e tempu ei, un generashon ta lamta sin mayor na kas, i awor nos ta kosechá e fruta marga. Mayornan ta obligá nan yunan bai den e laman turbulento di bida sin duna nan kompas.

Awor ekspertonan ta kuminsá lamta fo’i soño. Nan ta kuminsá realisá ku nan konseho tabata desastroso. Mas i mas dokumentashon ta demonstrá ku yunan ta sufri konsekuensianan negativo ora tur dos mayor ta traha pafó di kas. Sikólogoanon i outornan diplomá ta ekspresá nan preokupashon pa e echu ku mamanan ta bai traha mientras nan yu ta beibi ainda.

Dr. Barrie Brazelton, un spesialisista di mucha mundialmente renombrá, a splika ku un mama ku ta plania bai traha bèk poko tempu despues di duna lus, ta prepará su mes emoshonalmente (talbes inkonsiente) pa esei asta promé ku e beibi ta nase. E ta kuminsá sera su kurason pa ku su yu pa protehá su mes kontra e doló i pena di duna su beibi na un otro pèrsona pa kuid’è i kri’è. E mama ta realisá ku e lo no ta presente na momentunan inolvidabel—e mucha su promé stap, su promé palabra, èts. Segun Brazelton, e beibi ta sinti e isolashon i distansiamentu emoshonal di parti di su mama.

Nos Kreadó, sabiendo ku yunan tin mester di nan mayornan, a instruí mamanan pa “*pèrkurá pa nan kas*” (I Timoteo 5:14). Na griegu (e idioma na kua Tèstament Nobo a ser skirbí) esaki ta bisa “guberná kas”. Tito 2:5 ta reta mamanan pa ta “*bon ama di kas*” esta “traha na kas.” E instrukshon aki ta aplikabel dos manera. Un mama su empleo mester ta **na kas**. Di dos, siendo na kas, e mama mester ta okupá, no djis sinta pornada.

Para pensa un ratu. Esaki ta un preskripshon pa un solushon faktibel—maske e remedi ta kostoso! Siguiendo instrukshon di Beibel, mayornan mester pone materialismo un banda—**asta sakrifiká**—pa e mama por keda kas. **I siendo na kas, e mester dediká tempu pa eduká su yunan, i elevá norma i balornan!** Kuesta loke kuesta, nos mester ta despuesto pa paga e preis pasobra kiko ta mas importante ku edukashon di nos yunan?

Algun mama ta haña nan den sirkunstansia ku nan mester traha maske nan ta anhelá pa keda kas ku nan yunan. Nos tin komprehon pa kasonan asina. Ma nos ta preokupá ku basta mama ku tin pusibilidat di keda kas ku nan yunan, tòg ta pone sèn dilanti di nan yunan. Segun un enkuesta na Merka, 67% di mamanan empleá, ta traha pasobra nan **ke**, no pasobra nan **mester**. Sin duda e sífra na nos islanan ta otro. Ma sigur nos famianan i komunidad lo benefisiá si mamanan ku ta traha pasobra nan **ke** lo tuma nan responsabilidat na serio, bai kas i eduká nan yunan.

Nos a purba un plan ku a produsí un káos total—mamanan a bai traha. Ta tempu pa nos purba Dios Su plan—mamanan na kas—un plan ku sigur lo kosechá Dios Su bendishon den nos komunidad!